



ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

11.04.2016թ.

Ո Ր Ո Շ ՈՒ Մ

ՀՀ գնումների բողոքարկման խորհրդի

թիվ 28/16

ՀՀ գնումների բողոքարկման խորհրդի (այսուհետ նաև՝ Խորհուրդ) բողոքը քննող հանձնաժողովը՝ գործելով Խորհրդի անունից, քննելով «ՖԼԵՇ» ՍՊԸ-ի 29.03.2016թ. ներկայացրած բողոքը (այսուհետ նաև՝ ԳԲԽ-28/16 բողոք) և կից փաստաթղթերը, ՀՀ պաշտպանության նախարարության 05.04.2016թ. թիվ ԴՎԱ/842 գրությունը և կից փաստաթղթերը, «ԳԵՎԳՐԻԳ» ՍՊԸ-ի 04.04.2016թ. թիվ 004/16 գրությունը, «ԳԱԿ-ՇՀԱՊՁԲ-15/1-ՀՀ ՊՆ ՆՏԱԴ-ՇՀԱՊՁԲ-7/30» ծածկագրով ընթացակարգին վերաբերող փաստաթղթերը և ԳԲԽ-28/16 բողոքի վերաբերյալ «Գնումների աջակցման կենտրոն» ՊՈԱԿ-ի (այսուհետ նաև՝ Կենտրոն) 07.04.2016թ. ներկայացրած եզրակացությունը, պարզեց հետևյալը.

1. «ՖԼԵՇ» ՍՊԸ-ի ներկայացրած փաստերը, հիմնավորումները և պահանջը

«ՖԼԵՇ» ՍՊԸ-ն (այսուհետ նաև՝ Ընկերություն) 29.03.2016թ. ներկայացրած բողոքով հայտնել է, որ ՀՀ պաշտպանության նախարարության (այսուհետ նաև՝ Պատվիրատու) կարիքների համար հեղուկ վառելիքի ձեռքբերման նպատակով կազմակերպված «ԳԱԿ-ՇՀԱՊՁԲ-15/1-ՀՀ ՊՆ ՆՏԱԴ-ՇՀԱՊՁԲ-7/30» ծածկագրով շրջանակային համաձայնագրերի միջոցով գնում կատարելու ընթացակարգին (այսուհետ

նաև՝ Ընթացակարգ) մասնակցելու նպատակով «ՖԼԵՇ» ՍՊԸ-ն հայտ է ներկայացրել և «Չափաբաժին 4. Ավիավառելիք» մասով զբաղեցրել է 2-րդ տեղը, իսկ 1-ին տեղը զբաղեցրել է «ԳԵՎԳՐԻԳ» ՍՊԸ-ն: Գնումների բողոքարկման խորհրդի 22.03.2016թ. թիվ ՍՑ-02/16 որոշմամբ «ԳԵՎԳՐԻԳ» ՍՊԸ-ն ընդգրկվել է գնման գործընթացին մասնակցելու իրավունք չունեցող մասնակիցների ցուցակում (այսուհետ նաև՝ Ցուցակ):

Ընկերությունը վկայակոչել է «Գնումների մասին» ՀՀ օրենքի 5-րդ հոդվածի 1-ին մասի 4-րդ ենթակետը, որի համաձայն գնումների ընթացակարգերին մասնակցելու իրավունք չունեն անձինք, որոնք ներառված են գնումների գործընթացին մասնակցելու իրավունք չունեցող մասնակիցների ցուցակում: Հետևաբար «ԳԵՎԳՐԻԳ» ՍՊԸ-ն իրավունք չունի կնքել «ԳԱԿ-ՇՀԱՊՁԲ-15/1-ՀՀ ՊՆ ՆՏԱԴ-ՇՀԱՊՁԲ-7/30» ծածկագրով ՀՀ պաշտպանության նախարարության կարիքների համար հեղուկ վառելիքի գնման պայմանագիրը:

Ընկերությունը բողոքով ՀՀ գնումների բողոքարկման խորհրդին խնդրել է Օրենքի 48-րդ հոդվածի 6-րդ մասի 2-րդ ենթակետի հիման վրա մասնակիորեն դադարեցնել Պատվիրատուի կողմից Օրենքի 9-րդ հոդվածով նախատեսված անգործության ժամանակահատվածում պայմանագիր կնքելու որոշումը՝ «Չափաբաժին 4. Ավիավառելիք» մասով և առաջին տեղ զբաղեցրած մասնակից ճանաչել «ՖԼԵՇ» ՍՊԸ-ին:

«ՖԼԵՇ» ՍՊԸ-ի գործադիր տնօրենը, մասնակցելով 01.04.2016թ. ժամը 17:00-ին Կենտրոնում կայացած ԳԲԽ-28/16 բողոքը քննող հանձնաժողովի նիստին, պնդել է իր բողոքը:

2. «ԳԵՎԳՐԻԳ» ՍՊԸ կողմից բողոքի վերաբերյալ ներկայացված փաստերը, հիմնավորումները և դիրքորոշումը

«ԳԵՎԳՐԻԳ» ՍՊԸ-ն 04.04.2016թ. թիվ 004/16 գրությամբ ամբողջությամբ առարկել է 29.03.2016թ. «ՖԼԵՇ» ՍՊԸ-ի կողմից ներկայացված բողոքի պահանջների դեմ:

Ըստ «ԳԵՎԳՐԻԳ» ՍՊԸ-ի՝ բողոք բերողը չի ներկայացրել որևէ իրավական հիմք կամ փաստական հանգամանք, որի առկայությունը կարող է հիմք լինել գնումները

կարգավորող օրենսդրությամբ նախատեսված որևէ հիմքով Ընթացակարգի շրջանակներում պայմանագիր կնքելու մասին որոշումը դադարեցնելու մասին: Նշված որոշումն ընդունվել է օրենսդրական պահանջների պահպանմամբ, չկա որևէ հիմք այն անվավեր ճանաչելու համար:

Ելնելով վերոգրյալից՝ «ԳԵՎԳՐԻԳ» ՍՊԸ-ն խնդրել է «ՖԼԵՇ» ՍՊԸ-ի բողոքն ամբողջությամբ մերժել:

3. ՀՀ պաշտպանության նախարարության կողմից բողոքի վերաբերյալ ներկայացված փաստերը, հիմնավորումները և դիրքորոշումը

ՀՀ պաշտպանության նախարարությունը 05.04.2016թ. թիվ ԴՎԱ/842 գրությամբ ներկայացրել է «ԳԱԿ-ՇՀԱՊՁԲ-15/1-ՀՀ ՊՆ ՆՏԱԴ-ՇՀԱՊՁԲ-7/30» ծածկագրով շրջանակային համաձայնագրերի միջոցով գնում կատարելու ընթացակարգին վերաբերող անհրաժեշտ փաստաթղթերը:

ՀՀ պաշտպանության նախարարության ներկայացուցիչը, մասնակցելով 01.04.2016թ. ժամը 17:00-ին Կենտրոնում կայացած ԳԲԽ-28/16 բողոքը քննող հանձնաժողովի նիստին, որևէ առարկություն չի հայտնել «ՖԼԵՇ» ՍՊԸ-ի ներկայացրած բողոքի վերաբերյալ:

4. ԳԲԽ-28/16 բողոքի վերաբերյալ «Գնումների աջակցման կենտրոն» ՊՈԱԿ-ի դիրքորոշումը

«Գնումների աջակցման կենտրոն» ՊՈԱԿ-ը Խորհրդին է ներկայացրել իր 07.04.2016թ. եզրակացությունը և առաջարկել՝ «ՖԼԵՇ» ՍՊԸ-ի 29.03.2016թ. ներկայացրած բողոքը բավարարել մասնակի.

1. «ԳԱԿ-ՇՀԱՊՁԲ-15/1-ՀՀ ՊՆ ՆՏԱԴ-ՇՀԱՊՁԲ-7/30» ծածկագրով շրջանակային համաձայնագրերի միջոցով գնում կատարելու ընթացակարգի գնահատող հանձնաժողովի՝ Ընթացակարգի 4-րդ չափաբաժնի մասով «ԳԵՎԳՐԻԳ» ՍՊԸ-ի հետ

պայմանագիր կնքելու մասին որոշումը դադարեցնելու վերաբերյալ պահանջը բավարարել.

2. «ՖԼԵՇ» ՍՊԸ-ին՝ Ընթացակարգի 4-րդ չափաբաժնի մասով 1-ին տեղ զբաղեցրած մասնակից ճանաչելու մասին պահանջը մերժել:

3. ԳԲԽ-28/16 բողոքի քննության համար էական նշանակություն ունեցող փաստերը

ԳԲԽ-28/16 բողոքի քննության համար էական նշանակություն ունեն հետևյալ փաստերը՝

1. ՀՀ պաշտպանության նախարարության կողմից ՀՀ պաշտպանության նախարարության կարիքների համար հեղուկ վառելիքի ձեռքբերման նպատակով կազմակերպվել է «ԳԱԿ-ՇՀԱՊՁԲ-15/1-ՀՀ ՊՆ ՆՏԱԴ-ՇՀԱՊՁԲ-7/30» ծածկագրով շրջանակային համաձայնագրերի միջոցով գնում կատարելու ընթացակարգ:

2. «ՖԼԵՇ» ՍՊԸ-ն և «ԳԵՎԳՐԻԳ» ՍՊԸ-ն ՀՀ պաշտպանության նախարարության կողմից ՀՀ պաշտպանության նախարարության կարիքների համար հեղուկ վառելիքի ձեռքբերման նպատակով կազմակերպված «ԳԱԿ-ՇՀԱՊՁԲ-15/1-ՀՀ ՊՆ ՆՏԱԴ-ՇՀԱՊՁԲ-7/30» ծածկագրով շրջանակային համաձայնագրերի միջոցով գնում կատարելու ընթացակարգին մասնակցելու նպատակով **23.02.2016թ.** հայտեր են ներկայացրել:

3. Ընթացակարգի գնահատող հանձնաժողովը 24.02.2016թ. ժամը 11:00-ի թիվ 3 արձանագրությամբ որոշել է 1-ին, 2-րդ և 3-րդ չափաբաժինների մասով 1-ին տեղ զբաղեցրած մասնակից ճանաչել «ՖԼԵՇ» ՍՊԸ-ին, իսկ 4-րդ չափաբաժնի մասով՝ «ԳԵՎԳՐԻԳ» ՍՊԸ-ին:

4. Ընթացակարգի գնահատող հանձնաժողովը 17.03.2016թ. ժամը 11:00-ի թիվ 4 արձանագրության 1.2-րդ ենթակետով «ԳԵՎԳՐԻԳ» ՍՊԸ-ին ճանաչել է 4-րդ չափաբաժնի մասով ընտրված մասնակից և վերջինիս ներկայացրել է պայմանագիր կնքելու առաջարկ:

5. ՀՀ պաշտպանության նախարարության կողմից ՀՀ պաշտպանության նախարարության կարիքների համար հեղուկ վառելիքի ձեռքբերման նպատակով կազմակերպված «ԳԱԿ-ՇՀԱՊՁԲ-15/1-ՀՀ ՊՆ ՆՏԱԴ-ՇՀԱՊՁԲ-7/30» ծածկագրով շրջանակային համաձայնագրերի միջոցով գնում կատարելու ընթացակարգի պայմանագիր կնքելու որոշման հայտարարությունը www.gnumner.am համացանցային կայքում հրապարակվել է **22.03.2016թ.** և պայմանագրի կնքման անգործության ժամկետը սահմանվել է մինչև 01.04.2016թ. ներառյալ:

6. ՀՀ գնումների բողոքարկման խորհուրդը (այսուհետ նաև՝ Խորհուրդ) **22.03.2016թ. թիվ ՍՑ-02/16** որոշմամբ բավարարել է ՀՀ ֆինանսների նախարարության 04.03.2016թ. թիվ 1/73-1/8493-16 գրությամբ ներկայացված «ԳԵՎԳՐԻԳ» ՍՊԸ-ին գնման գործընթացին մասնակցելու իրավունք չունեցող մասնակիցների ցուցակում ներառելու պաշտոնական ընթացակարգով նախաձեռնած բողոքը և **«ԳԵՎԳՐԻԳ» ՍՊԸ-ին ներառել է գնման գործընթացին մասնակցելու իրավունք չունեցող մասնակիցների ցուցակում՝ Խորհրդի որոշումը կայացվելու օրվանից հաշված տասնմեկ ամիս ժամկետով ժամկետով:**

5. Խորհրդի հիմնավորումները և եզրահանգումը

Խորհուրդն, ուսումնասիրելով «ՖԼԵՇ» ՍՊԸ-ի 29.03.2015թ. ներկայացրած բողոքը, ՀՀ գնումների բողոքարկման խորհրդի 22.03.2016թ. թիվ ՍՑ-02/16 որոշումը, «ԳԵՎԳՐԻԳ» ՍՊԸ-ի գրությունը, հայտնում է հետևյալը:

Օրենքի 2-րդ հոդվածի 25-րդ կետի համաձայն՝ **գնման գործընթացը** գնում կատարելու վերաբերյալ գնումների մասին Հայաստանի Հանրապետության օրենսդրությամբ նախատեսված ընթացակարգերի, իրավունքների և պարտականությունների իրագործմանն ուղղված գործողությունների ամբողջությունն է:

Օրենքի 5-րդ հոդվածի 1-ին մասի 4-րդ կետի համաձայն՝ բացառությամբ նույն Օրենքի 20-րդ հոդվածի 5-րդ մասով նախատեսված ընթացակարգով գնում կատարելու դեպքերի, **գնումների ընթացակարգերին մասնակցելու իրավունք չունեն անձինք,**

որոնք ներառված են գնումների գործընթացին մասնակցելու իրավունք չունեցող մասնակիցների ցուցակում:

ՀՀ կառավարության 10.02.2011թ. թիվ 168-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 4-րդ կետի համաձայն՝ գնման գործընթացը հետևյալ գործընթացների (գործառույթների) ամբողջությունն է՝

- 1) գնումների պլանավորում.
- 2) գնումների նախապատրաստում.

3) պայմանագրի կնքում.

4) պայմանագրի կապարում:

ՀՀ պաշտպանության նախարարության կողմից ՀՀ պաշտպանության նախարարության կարիքների համար հեղուկ վառելիքի ձեռքբերման նպատակով կազմակերպվել է «ԳԱԿ-ՇՀԱՊՁԲ-15/1-ՀՀ ՊՆ ՆՏԱԴ-ՇՀԱՊՁԲ-7/30» ծածկագրով շրջանակային համաձայնագրերի միջոցով գնում կատարելու ընթացակարգի գնահատող հանձնաժողովը **24.02.2016թ.** ժամը 11:00-ի թիվ 3 արձանագրությամբ որոշել է 4-րդ չափաբաժնի մասով որպես 1-ին տեղ զբաղեցրած մասնակից ճանաչել «ԳԵՎԳՐԻԳ» ՍՊԸ-ին: Ընթացակարգի գնահատող հանձնաժողովը **17.03.2016թ.** ժամը 11:00-ի թիվ 4 արձանագրության 1.2-րդ ենթակետով «ԳԵՎԳՐԻԳ» ՍՊԸ-ին ճանաչել է 4-րդ չափաբաժնի մասով ընտրված մասնակից և **22.03.2016թ.** Պատվիրատուի կողմից հրապարակվել է պայմանագրի կնքելու մասին որոշման հայտարարությունը՝ սահմանելով անգործության ժամկետ մինչև 01.04.2016թ. ներառյալ:

Միևնույն ժամանակ Խորհուրդը արձանագրում է, որ Գնումների բողոքարկման Խորհուրդը **22.03.2016թ. թիվ ՍՑ-02/16** որոշմամբ բավարարել է ՀՀ ֆինանսների նախարարության 04.03.2016թ. թիվ 1/73-1/8493-16 գրությամբ ներկայացված «ԳԵՎԳՐԻԳ» ՍՊԸ-ին (ՀՎՀՀ՝ 02621665) գնումների գործընթացին մասնակցելու իրավունք չունեցող մասնակիցների ցուցակում ընդգրկելու պաշտոնական ընթացակարգով նախաձեռնած բողոքը՝ **Ընկերությանը ներառելով գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների բողոքարկման Խորհրդի որոշումը կայացվելու օրվանից հաշված տասնմեկ ամիս ժամկետով:**

Համաձայն Կարգի 4-րդ կետի՝ գնման գործընթացը ենթադրում է մի շարք գործողությունների ամբողջություն, այն է՝ գնումների պլանավորում, գնումների նախապատրաստում, պայմանագրի կնքում և պայմանագրի կատարում:

Օրենքի 5-րդ հոդվածի 1-ին մասի 4-րդ կետի համաձայն՝ բացառությամբ նույն Օրենքի 20-րդ հոդվածի 5-րդ մասով նախատեսված ընթացակարգով գնում կատարելու դեպքերի, **գնումների ընթացակարգերին մասնակցելու իրավունք չունեն անձինք, որոնք ներառված են գնումների գործընթացին մասնակցելու իրավունք չունեցող մասնակիցների ցուցակում**:

Այսպիսով, հաշվի առնելով այն հանգամանքը, որ գնման գործընթացն իր մեջ ներառում է նաև պայմանագրի կնքման և պայմանագրի կատարման փուլերը, իսկ «ԳԵՎԳՐԻԳ» ՍՊԸ-ն գնման գործընթացի պայմանագրի կնքման փուլում ՀՀ գնումների բողոքարկման խորհրդի 22.03.2016թ. թիվ ՍՑ-02/16 որոշմամբ ներառվել է գնման գործընթացին մասնակցելու իրավունք չունեցող մասնակիցների ցուցակում, հետևաբար, հիմք ընդունելով Օրենքի 5-րդ հոդվածի 1-ին մասի 4-րդ կետի և Կարգի 4-րդ կետի դրույթները, Խորհուրդը գտնում է, որ «ԳԵՎԳՐԻԳ» ՍՊԸ-ն իրավունք չունի շարունակել մասնակցելու գնման գործընթացին:

Նման պայմաններում Խորհուրդը գտնում է, որ Ընթացակարգի գնահատող հանձնաժողովի՝ Ընթացակարգի 4-րդ չափաբաժնի մասով «ԳԵՎԳՐԻԳ» ՍՊԸ-ի հետ պայմանագիր կնքելու մասին որոշումը դադարեցնելու վերաբերյալ պահանջը հիմնավոր է, ուստի Խորհուրդը գտնում է, որ «ՖԼԵՇ» ՍՊԸ-ի բողոքը նշված մասով ենթակա է բավարարման:

Ինչ վերաբերում է «ՖԼԵՇ» ՍՊԸ-ին՝ Ընթացակարգի 4-րդ չափաբաժնի մասով 1-ին տեղ զբաղեցրած մասնակից ճանաչելու պահանջին, ապա անհրաժեշտ է նշել, որ ՀՀ գնումների բողոքարկման խորհուրդը, «Գնումների մասին» ՀՀ օրենքի 48-րդ հոդվածի 6-րդ մասի համաձայն, Ընկերությանն Ընթացակարգի 1-ին տեղ զբաղեցրած մասնակից ճանաչելու վերաբերյալ որոշում կայացնելու լիազորություն չունի, հետևաբար «ՖԼԵՇ» ՍՊԸ-ի բողոքը նշված մասով ենթակա է մերժման:

Հիմք ընդունելով վերոհիշյալը՝ Խորհուրդը գտնում է, որ «ՖԼԵՇ» ՍՊԸ-ի կողմից 29.03.2016թ. ներկայացված բողոքը հիմնավոր է, և ենթակա է մասնակի բավարարման:

Ելնելով վերոգրյալից և ղեկավարվելով «Գնումների մասին» ՀՀ օրենքի 48-րդ հոդվածի 5-րդ մասով՝ ՀՀ գնումների բողոքարկման խորհուրդը

Ո Ր Ո Շ Ե Ց

«ՖԼԵՇ» ՍՊԸ-ի 29.03.2016թ. ներկայացրած բողոքը բավարարել մասնակի.

1. «ԳԱԿ-ՇՀԱՊՁԲ-15/1-ՀՀ ՊՆ ՆՏԱԴ-ՇՀԱՊՁԲ-7/30» ծածկագրով շրջանակային համաձայնագրերի միջոցով գնում կատարելու ընթացակարգի գնահատող հանձնաժողովի՝ Ընթացակարգի 4-րդ չափաբաժնի մասով «ԳԵՎԳՐԻԳ» ՍՊԸ-ի հետ գնման պայմանագիր կնքելու մասին որոշումը դադարեցնելու վերաբերյալ պահանջը բավարարել.

2. «ՖԼԵՇ» ՍՊԸ-ին՝ Ընթացակարգի 4-րդ չափաբաժնի մասով 1-ին տեղ զբաղեցրած մասնակից ճանաչելու մասին պահանջը մերժել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

Բողոքը քննող հանձնաժողով՝

Անդամներ՝



Վարդանյան Սեդրակ



Մնացականյան Հասմիկ